

枕碧樓偶存稿

枕碧樓存稿卷六

文六

南軒易說跋

南軒易說五卷抄本起繫辭天一地二節至雜卦傳止朱竹垞經義考云十一卷未見是傳本甚希董真卿元初人已言乾坤闕此本從胡順父本寫出胡本刊於至元壬辰與真卿約略同時但稱易繫是原無六十四卦此本無上傳之半蓋又殘闕矣南軒先生爲胡五峯宏門人五峯易外傳一卷載五峯集自屯至剝多引史事董真卿言南軒先生易說學本五峯胡氏以周程爲宗然周程言理胡徵史其宗旨微不同此五卷中言理多而徵史者絕少與五峯外傳宗旨不合特未知亡卷內所言何如耳程傳言天一至地十合在天數五上初未移其次第朱子本義始連天數五一節移于大衍之數一節之前此書次第與本義

合能研諸侯之慮不解侯之二字當必以爲衍文亦與本義合是其書用本義本也其雜卦注云易之雜卦乃言卦畫反對各以類而言非雜也又云雜卦乃以其類相生惟乾坤坎離小過大過中孚頤八卦無反對此聖人之精意惟穆伯長老蘇明之諸家並不達此則其所推重者不獨周程二家伯長穆脩字其易說不傳語無可考東坡易傳紹述父書老蘇之語自在其中朱子嘗駁蘇氏之說而南軒之意甚推重之南軒與朱子爲友而立說不苟同如此注中謂鄭康成溺於緯書乃云河圖有九篇洛書有二篇而孔安國又以河圖爲八卦洛書爲九疇此皆蕪穢聖經者是不取圖書之說與談漢學者之宗旨殊矣原本首卷有曹溶鈕琇翁吳城繡谷亭續藏書四朱記卷中有吳城敦復各朱記卷首又有翰林院印曹倦圃晚年自號鈕菜

翁好收宋元人文集有靜惕堂書目吳焯錢塘人字尺鳧
構亭曰繡谷自號繡谷老人其長子名城字敦復此書卷
末跋語云靜惕堂古林書目有此此卽其藏本也從湖州
書賈得之識數語以誌喜當爲吳敦復所記後亦有繡谷
亭續藏書朱記當爲敦復續獲之本故以續藏爲別以此
推之此書原爲倦圃所藏後歸吳氏乾隆間 四庫館開
城弟玉墀恭進書一百數十種此書當卽在其中 四庫
目錄於各書中注明浙江吳玉墀家藏本皆爲其所進之
書而此書獨注云內府藏本殆編錄之偶誤歟書曾入
四庫館故有翰林院印胡序末有鉤摹三小印一作謙卦
一曰贛州胡氏一曰咏卿並同總目所說知確爲當時真
本此流傳之蹤迹可以考見者也不知何時流落人間同
治甲戌余於廠肆見而購歸雖係殘帙實有宋說易者之

一家 四庫本既未流布於世各家書目暨各叢書亦罕見此編付諸手民庶不至終淪于蟬蠹原本分五卷館本併序卦說卦雜卦爲一卷故作三卷茲仍五卷之舊第原題曰南軒先生張侍講易說今改定曰南軒易說从館本也宣統庚戌春二月

內外服制通釋跋

宋車垓內外服制通釋七卷鈔本卷首有吳焯吳城敦復三朱記及翰林院印卷面有乾隆三十八年 月浙江巡撫三寶送到吳玉墀家藏內外服制通釋壹部計書壹本朱記一是此本實 四庫館所收繡谷吳氏之原本也卷首又有竹垞藏本巽流傳勿損污教經堂三朱記卷中有海陵錢氏青燈閣藏書畫圖書教經堂錢氏章犀盒藏本五經無雙錢犀盒珍藏印五朱記據乾隆四十二年浙撫

咨文吳氏此書爲未經領回之本是此本由吳氏而入

四庫館由館而卽入於錢氏錢名桂林泰興人道光庚戌

翰林久在清祕堂者竹垞藏本朱記亦出於錢氏

其印泥之色與

錢氏諸朱記同然總目謂竹垞所見之本與此本同不謂此本卽

竹垞藏本也 四庫館於各省進呈書籍謄錄之後皆發

還本家故於卷面加一朱記卷首又蓋以翰林院印以便

檢查余所見之本大抵有翰林院印而無卷面之朱記疑

各書流傳人間歲月經久翰林院印在卷內尙不至盡行

毀損卷面易毀損藏書家重付裝池故朱記鮮有存者此

本卷面朱記猶存其爲當時館本毫無可疑而總目注稱

兩淮鹽政採進本與朱記不合所未詳也其書於服制之

異同分析至爲詳盡故總目極稱之惜闕卷不可復得三

殤尙易考求深衣疑義但存良驥之語餘無可考世所傳

三父八母圖咸謂出于元典章而實先見于此書是元典章亦採自此書蓋此書世鮮傳本故知之者鮮也宣統辛亥閏夏

河南集跋

宋穆脩河南集三卷附穆參軍遺事一卷日照許印林手鈔本凡詩五十六文二十後有劉清之序與四庫本同脩以古文名所作當不止此而所傳者止此許所據爲舊鈔本是卽此三卷傳本亦甚希也脩傳易學于陳搏南軒易說於雜卦傳云此聖人之深意惟穆伯長老蘇明之諸家竝不達此則脩本有說易之書南軒猶及見之尹師魯從脩游傳其春秋學則脩又當有說春秋之書是脩不僅以文名而今皆不傳則其所不傳者多矣集中亳州魏武帝帳廟記提要斥其謬而刊除之論極嚴正曹操本不當

有廟而記云真宗增故廟而新之又稱今樞密右丞相清河公來撫于亳出俸緡合民之用成三帳置殿內清河公張知白也當時頗負人望其事固君相唱之脩不過爲之記述耳司馬溫公通鑑且以正統予魏北宋人議論如此不必以此病脩今仍存之以著其實 四庫本題曰穆參軍集今仍曰河南集者仍其舊也宣統二年正月

花谿集跋

花谿集三卷吾宗原昭先生之所著也湖州府志花谿在府城東南七十里一名花城元沈夢麟築別業於谿東花木蔥鬱故名明陳繼儒妮古錄雪有花谿勝國時人多寫花谿漁隱蓋是趙承旨首倡之王叔明是趙家甥故亦作數幅今皆爲董元宰所藏元宰嘗欲買山雪上以應畫識是花谿之名元時盛稱於世故卽以舊隱名其集先生於

明初卻徵不就而嘗三校文閩浙兩充會試同考集中杞
菊軒記洪武丙子秋歲當大比閩府二司以禮幣來吳興
招予主鄉闈其赴闕考試詩云閩闕貽書招校藝可見明
初鄉試主考由行省自行延聘不關中朝院中夜坐詩乃
浙闈所作其句云檄下丘園赴考文當時書幣外自別具
公牘故亦稱檄卽會試同考亦必訪求績學之士禮聘而
來不若後來之出於特簡也彭韶序云年垂九而沒後序
亦云年九十提要從之府志云年九十三則與孫承澤益
智錄之言合而與序不合集甯壽堂序云犬馬之年九
十有二是其年逾九十確有明證彭序當有誤至贈筆生
陸文俊詩老夫今年九十九則又與上說皆不相合或此
詩爲他人所作羈人集中歟抑九十九句有譌字歟其三
月二十二日承恩後赴部給文諸公索賦詩曰有子無成

有孫惡曰上黷天刑下覆宗曰陳情有書訴天庭曰玉音
肆赦盈眾耳曰全家放我歸田里是先生以孫惡而幾罹
於禍仍得全家放歸也乃彭序云子孫謫戍北鄙後序云
先生卒後子孫遭罹變故謫戍邊鄙豈先生卒而舊獄重
翻歟今不可考矣後序不署姓名考之鄭芷畦湖錄乃何
喬新也此本爲董綬金推丞在日本時假其舊帙迻寫歸
來凡賦二記六序二贊二樂府二十五古四十八七古二
十五律十三五言長律三七律二百十九七言長律一五
絕十二七絕七十一補錄八共得文詩四百二十七與李
跋四百二十四之數不符或補錄者不在原數之中而原
數則有殘缺之處卷一清平山賦後原缺十四行此其證
也集中七律居全集之半當時有沈八句之名然其五古
氣體甚高不同凡近彭序言先生精易學當必有撰述惜

遭家難多散逸矣今校付手民行款一仍其舊並附校語于後安所得精本而再校之宣統庚戌孟夏

來鶴亭集跋

呂誠來鶴亭集九卷前有朱記一日多慧之印章又有翰林院印蓋四庫館所收呈獻之原書提要注浙江鮑士恭家藏本當亦奉旨發還而本家未經領回者也提要稱誠于明初嘗謫遷廣東今檢卷二洪武辛亥南歸詩云去年竄逐下南溟卷一南海道中諸詩有霜旭開晴曉出關十八灘頭秋水高等句並皆南行時作是其謫遷在庚戌年秋逾年卽放歸而諸詩之前又有立春及冬夜諸詩當又在庚戌之前補遺詩有甲戌乙亥兩年作爲洪武二十七八年上溯庚戌辛亥爲洪武三四年各卷詩亦多題洪武年月是此集所作並當洪武之世故自爲一編鄭東

後序題至正八年已稱哀其詩若干卷楊廉夫序之楊序作于至正七年亦稱古有樂府若干首並不見此集當別爲一編今已亡逸顧嗣立稱其尙有旣白軒竹洲歸田諸藁而今集中有歸田竹洲諸詩疑諸藁已有編入此集中者惟元時所作則不在此數至正丁亥以前已有詩若干卷更自戊子至丁未歷二十年誠旣喜爲詩其所作必多豈時當離亂而散逸歟抑語有所避忌而不傳歟觀其南遷非無故也卷中多墨筆塗乙之處當是四庫館臣校勘之迹但無校語耳今重校一通付諸手民并附校語于後
光緒辛亥長夏

王斗山人文集跋

元王奕玉斗山人文集三卷鈔本前有平江黃氏圖書朱記一及翰林院印爲 四庫館所收呈進之本原題南宋

王奕殊筆改爲元與提要之語相合余又假得烏絲闌鈔本亦有翰林院印并有館校原簽簽中有稱分校蔡必昌者是當日館中所收有二本此本鈔手劣譌字多烏絲闌本亦多譌字而鈔手較工故當日校者以烏絲闌爲正本而以此本校之如祖庭觀丁歌題維揚諸詩皆有據此本改正之句兩本殆非同出一原亦互有短長也館校莫先師孟子文謂錄訖當爲剝訖未考集中多錄訖之文山人丁宋元易代之時故屢有此語和元遺山詩卯也不敗露此本敗譌敢而彼本殘缺遂校云未詳是何字則又未取遺山集一對勘此館校之未盡完善處總目題明浙江鮑士恭家本當卽指烏絲闌本而言卷末附錄李空同題此集詩頗致想像之思殆空同倡言復古不作唐以後語而山人詩雖涉于粗頗磊落有豪氣無成化以後嚶緩之音

故沆瀣相投歟光緒辛亥初秋

萬曆大明會典跋

大明會典二百二十八卷明萬厯重修本也萬厯二年禮科給事中林景暘等疏請將弘治十五年以後事例命官編輯增入會典經禮科以聞奉旨是四年大學士張居正等始題請舉行十五年書成卷首列弘治十五年孝宗御製序正德四年武宗御製序萬厯十五年神宗御製序次弘治正德嘉靖萬厯四朝敕諭次纂輯諸書名諸司職掌大誥大明令大明集禮洪武禮制禮儀定式稽古定制孝慈錄教民榜文大明律軍法定律憲綱次開報文冊衙門次弘治凡例次嘉靖續纂凡例次萬厯四年重修題本部編輯事例送館劄子按明代不稱劄子次萬厯重修凡例次萬厯十五年大學士申時行等進書表次重修職名此本來自東瀛卷中有島田氏雙桂樓收藏及島

田翰讀書記各朱印記不知何時流入海外據天祿琳琅書目所述卷首序敕諸篇一一符合實一本也天祿琳琅書目云考大明會典一書始修於弘治重訂於正德嘉靖時復加參補增入弘治十六年以後事例至萬厯間又增入嘉靖二十八年以後條例校刊成書故明史藝文志稱爲萬厯中重修大明會典第此書自孝宗訖神宗四朝俱經纂輯而世宗獨無御製序文按書中所刊萬厯四年諭旨謂世宗申命儒臣重加修輯比及進覽訖未頒行似於聖心猶有未當據此則世宗時僅以藁本進覽並未刊行故不爲製序非有關佚也今按唐宋皆有會要兩漢會要後人補輯唐又有六典會典之名蓋兼二書之體制者也明會典先修于弘治書成而孝宗卽世至正德四年重校刊行故有孝宗武宗二序再修于嘉靖據張居正等疏稱

世宗皇帝嘗命儒臣續修會典自弘治十五年至嘉靖二十八年而止已經進呈未蒙刊布是嘉靖本書成而未刊行世宗晚年專心修道政事廢弛此等書進呈之後卽束置高閣矣復修于萬厯卽此本是明藝文志故事類所錄者此書也所不可解者天祿琳琅旣藏有此書何以四庫全書總目所收者但有弘治本提要云嘉靖八年續修會典五十三卷萬厯續修會典二百二十八卷今皆未見其本莫知存佚是館臣實未見此書故所言如此豈天祿琳琅書目編自內直諸臣之手故館臣不及知歟迨書目旣成之後藏之內廷館臣不獲寓目歟有如天祿琳琅書目所載萬首唐人絕句前編所錄有兩宋本竝一百一卷而四庫全書所錄乃九十一卷可見當日中祕之書不盡發交四庫館校閱故館臣無從編述此書亦其比也近

來收藏家書目所錄竝弘治本而無萬厯本可見此本流傳甚希殊可寶貴故以重值購置法律學堂以爲參稽之助言明制者此爲備矣

天一閣書目跋

天一閣藏書黃梨洲全謝山先後爲之記而書目亦藏于閣未行世也嘉慶中阮文達公來撫吾浙乃屬其後人校錄書目於戊辰歲與碑目同付手民序之而行於世其所藏書精本甚多惜塵封閣上未能流播士林耳余嘗訪求厯代法律之書漢以上無聞已唐則有唐律疏議爲陽湖孫氏影刻元泰定本明律傳本較夥所見有嘉靖本隆慶本萬厯本元律見於元史刑法志近又假得元典章鈔本將精刻以傳於世惟宋代刑統傳本甚尠各家藏書目都未著錄初以爲世間已無此書矣刑統賦注中所採各律

與唐律文有同異當爲刑統之文宋元人著述中亦有引及律文者但能得其大略而已偶閱此編載有刑統三十卷烏絲闌鈔本方以爲兵火之後閣書未必存近得薛氏所刊天一閣見存書目則刑統尙存但缺卷一至四閣書散而復聚而此希有之帙已亡而未盡亡若冥冥中有呵護之者苟不思爲之傳播又何貴乎藏書哉今倩人前往迻寫未知能如約否自來尋常說部之書往往爭相傳刻獨此等書關係一代典章羣視爲無用之故紙竟無人問津可以見中國法律之學不絕如縷非官此官者莫肯一寓目焉邇云窮究其源流而討論其得失哉魏衛凱請置律博士轉相教授事克施行故六代時頗重律學唐宋皆設此官元明以後此官廢而不設教授無人律學之不講求豈偶然哉

天一閣碑目跋

明代好金石者世稱都楊郭趙四家而不及范氏豈知天一閣碑刻之富遠過四家特無人爲之鑒賞遂沈沒於塵封蛛網之中耳閣之碑先未有目全謝山作碑目一通而爲之記迨乾隆丁未錢竹汀借海鹽張芑堂燕昌及范氏裔孫輩舟懋敏同登是閣則謝山之目已不知流落何所矣因相約撰次碑目輩舟任斯役成碑目一卷竹汀序之稱自三代迄宋元得七百二十餘通明碑不著錄嘉慶戊辰校刻書目乃附碑目於後迨兵燹之後閣碑散失殆盡僅存二十餘通錢念劬校錄書目尙成四卷而碑目不能成卷矣乾隆己酉張芑堂重模北宋榻石鼓文道光丁亥陽羨程璋重模瘞鶴銘共據閣中藏本今重模本尙在而原藏本不知流落何方尙在人間否讀謝山之記竹汀之

序爲之慨然

天一閣見存書目跋

凡物必聚於所好好之而無力以聚之則不能聚有力以聚之矣而所聚之物或不能如其所欲聚之素念則仍不能聚卽有力以聚之且能如其所欲聚之素念矣而非子子孫孫無不以高曾之所好爲好相與世世保守之則已聚者亦終歸於不能聚甚矣聚之之難也尋常有力者之所聚多在狗馬聲色之間此至不足道者若奇器若法書若名畫其可貴者也而皆不若書然聚書之難聚之久而不散爲尤難黃梨洲嘗歎之矣大抵物之久聚而不散爲造物之所忌而書爲甚他物之聚也不必有名而書獨得名名尤爲造物之所忌者歸震川謂書之所聚當有如金寶之氣卿雲輪囷覆護其上而孰知此輪囷覆護之氣正

爲忌之招哉海內聚書之家無久聚而不散者大略多者
六七十年或四五十年少者或三二十年或及身而止或
子若孫而止未聞有逾百年者亦未聞有子子孫孫世世
保守之者梁洲藏書記中已深慨之卽如吾鄉陸氏之書
其始聚也在同治中葉聚之二十年而克成鉅觀今全歸
三島矣前後不過四十年吾見其聚吾又見其散如雲煙
之過眼刹卽間耳武林丁氏之書近又萌將散之兆矣書
之聚而不散豈非希有之事哉鄞縣范氏天一閣之書聚
於前明嘉靖年間堯卿少司馬欽好書嘗從豐氏萬卷樓
鈔書迨豐氏之書散落其幸存者歸于范氏而書之聚於
天一閣者始富 國朝康熙雍正間少司馬之曾孫潞公
吏部光文友仲校官光燮元孫載瞻大令正輅又皆續有
所聚世歷四五年逾二百其聚之之時旣久而所以能保

守其所聚者亦久至咸豐之季蓋三百餘載矣書之聚若是之久而前此所罕聞也辛酉粵匪之亂閣破書亡向詫爲聚之久者幾幾乎不復能聚矣裔孫大令邦綏聞書爲外
人所得或賣諸鄰邑急貨款贖回又偕諸宗老多方訪購而書始稍稍復歸初以爲已散而不復聚者又幾幾乎能復聚矣迨今又四十餘年雖其書未克盡復舊觀而書之聚之久而散散而仍聚也若是更前此所未聞也梨洲藏書記言嘉靖至今蓋已百五十年稱其聚之久也今去梨洲時又二百餘年矣縣縣延延子子孫孫永保守豈非宇宙間絕無僅有者哉書目刻於嘉慶戊辰阮文達序而行世光緒己丑薛叔耘星使福成方觀晉浙東時錢念劬星使恂在其幕中薛公以編輯目事屬念劬就閣校錄凡再歷寒暑三易稿而後成書爲卷四

聖諭

御賜書

御題書別爲一卷冠於前進呈書目范氏家著碑目新藏書目別爲一卷殿於後顏曰天一閣見存書目紀其實也今取舊目與新目互校原書存者約十之四而舊無目今有書者正復不少其爲舊目之編錄未審歟抑後來購贖有所增益歟全謝山有薛尚功手書鐘鼎款識跋爲閣中珍品無書無目他若傳鈔本吳兔牀有海甯備考之類確從閣中鈔來亦無其目則舊目之失載者殆不少矣念劬校勘精審新目遠勝舊目余檢校一過因歎同爲閣中之書新目所載何幸而散而仍聚也舊目所載何不幸而散而不能皆聚也甚矣聚之之難也

天祿琳琅書目跋

欽定天祿琳琅書目十卷乾隆四十年奉 敕編後編二十卷嘉慶二年奉 敕編前編校語云自乾隆甲子年哀

集 內府儲藏羣籍中善本列架庋藏於 昭仁殿 賜

名天祿琳琅迄今三十餘年珍儲愈廣因重加整比輯爲
總目其次序則宋金元明版各從其代仍以經史子集分
類其明影宋鈔之精者亦皆選入或一書而兩刻皆工一
刻而兩印皆妙者則並登之每種詳其鋟刻年月及收藏
家題跋印記其經 御製題識者則錄於鑒藏之首以昭
執林榮遇蓋自來藏書譜錄未有美富精詳若斯之盛者
也後編識語云溯初編時五十餘年書目成亦二十餘年
矣逮今嘉慶丁巳十月乃有 天祿琳琅書目後編之輯
越七月編成 臣等謹合前後二編校之其書中體例紀載
一依前帙互見別出各有源流而其規撫有拓而愈大析
而彌精者如前編書目十卷後編則二十卷前編書四百
部後編則六百六十三部萬有二千二百五十八冊視四

庫全書踰三之一前宋元明外僅金刻一種後編則宋遼金元明五朝俱全凡皆宛委琅函娜嬛寶簡前人評跋名家印記確有可證絕無翻雕贗刻爲坊肆書賈及好事家所僞託者本按前編已入四庫總目後編書成在總目之後故未錄入世無傳本罕獲見者光緒十年祭酒王先謙得舊鈔前後兩編合刻于長沙遂傳于世 中前古籍如數家珍洵菽林寶笈也今以四庫總目校之如此目前編明板史部大明會典爲萬厯重修本而總目所錄者弘治本也又明板集部萬首唐人絕句凡兩本竝一前一卷本而總目所錄者九十一卷本也大明會典世所傳者多弘治本昨歲於日本書估得萬厯本與天祿琳琅本相校確爲當日官刊之書已詳萬厯大明會典跋矣萬首唐人絕句前編有兩本竝三函十五冊五六言二十六卷七言七

十五卷係明代翻刻汪綱本一闕卷七十四十五一闕補

五言卷十五六七言卷八十五卷六十三十三卷七十四

十三是前編所收二本但有缺頁而無缺卷又後編宋板

集部一本四函二十四冊汪綱本不言闕補則尤爲完全

之本後編之書當四庫開館時或尙未入中祕而前

編之書固在四十七年以前也總目四十七年成何以館臣未及

見也前編提要云考是書宋時舊本有一百卷一百一卷

之不同其一百卷者爲邁所自刊半刻於會稽半刻於鄱

易之本也一百一卷者爲汪綱守越時所刊合鄱易會稽

之本而併刻之者也又有吳格重修本則僅屬會稽初刻

之本也此書爲一百一卷乃依汪綱本翻刻於明時者耳

觀洪邁自序云今以所編合爲百卷刻之蓬萊閣中序後

又有自題云越府所刻七言至二十六卷五言至二十卷

而奉祠歸鄱易惟書不可以不成乃雇嫠匠續之於容齋
旬月而畢此百卷之名與刊刻之地言之鑿鑿無可疑者
故陳振孫書錄解題嘗爲詳悉言之謂邁編七言七十五
卷五言六言二十五卷卷各百首凡萬首上之振孫所言
固指會稽鄱易合刻之本也此書所載汪綱識語則謂唐
人絕句一百一卷半刻會稽半刻鄱易嘉定癸未新安汪
綱守越遂搨鄱易本併刻之使合而爲一云云是綱已變
稱一百卷者爲一百一卷矣原其互異之故邁所自刻五
六言共二十五卷此本則以六言分出列爲第二十六卷
故增多一卷也據此所言於是書源流頗爲詳盡前編所
收凡三本竝一百一卷本非洪刻之原書四庫所收九十
一卷下注內府藏本總目提要云原本一百卷以百首爲
率而卷十九至卷二十二皆不滿百首又五言止十六卷

合之七言七十五卷亦不滿百卷目錄後載嘉定紹興守
吳格跋謂原書歲久蠹闕因修補以永其傳此本當是修
補之後復又散佚也是四庫所收者爲吳格本與天祿
琳琅書目所稱吳格重修本僅屬會稽初刻之語不合查
慎行人海記養心殿送到萬首唐人絕句一部眞南宋本
前有洪容齋序紹熙元年刻於越州蓬萊閣初止四十卷
旣而容齋歸鄞易續刻成書遂滿萬首之數每一卷計詩
百首共一百零一卷紹熙三年奏進重華宮壽皇稱其精
博賜茶一百斡清馥香十帖薰香二十帖金器一百兩遂
復上表謝恩前後劄子奏狀俱載卷首至嘉定癸未新安
汪綱守越遂搨鄞本并刻之今本卽嘉定中合刻者但檢
對目錄現存僅七十五卷缺二十六卷爲可惜耳據查所
言前因本外又有七十五卷之本天一閣書目所錄亦七

十五卷與查所見同是 內府所藏共有五本而 四庫館臣所見者但有九十一卷之本豈以完全之本當時極爲珍惜故未發交 四庫館歟查所見者既爲南宋本大可寶貴豈以其殘缺之本故 天祿琳琅書目皆屏而不錄歟此其故不可得而詳矣容齋三筆稱余所編唐人絕句得七言七千五百首五言二千五百首合爲萬首而六言不滿六十信乎其難也是六言六十首實在萬首之外因不滿百首原編附于五言之後汪氏析出自爲一卷爲一百一卷本遂有畸零之數非體也又後編首部 御題算經爲周髀九章孫子五曹張丘建夏侯陽緝古七種乃宋祕書省本而 四庫總目所錄者張丘建緝古二種係汲古閣影宋鈔本周髀九章孫子五曹夏侯陽五種係永樂大典本其周髀一種舊有刻本中多脫誤館臣以永樂

大典本校定故亦爲永樂大典本也總目之成在四十七年壬寅而御題算經則四十八年癸卯得書在後故館臣不及見鮑氏知不足齋叢書所收算經有孫子五曹張丘建緝古四種竝汲古閣景鈔宋祕書省本與天祿琳琅書目本同出一源四庫所收張丘建緝古二種注云吏部侍郎王杰家藏本是影宋鈔本人間不止一部不及毛氏汲古閣七種竝全後來毛本鮑氏得其四其餘三本又不知流落何處雲煙過眼聚散無常豈獨書籍如是哉幸而獲登天府自乾隆甲子以來又過兩甲子倏將弟四甲子皇圖永固卽古籍長存洵爲菽林之盛事矣

河汾旅話跋

河汾旅話四卷海鹽朱維魚著抄本光緒六年余於琉璃廠書攤以當十銅錢廿五枚購得之維魚字牧人乾隆某

科舉人其仕履未詳詢之同年海鹽朱桂卿學士亦不知
其人言非其同宗也此編乃牧人於乾隆丁酉六月自西
安入都時田方干畿王宜之垣長欲赴汾陽相約同行歷
旬有二日途中互述聞見都爲一冊所記山川古蹟遺聞
佚事旁及草木禽魚而經史之考證亦附見焉洪纖畢具
淵雅可誦末有田王二君跋田汾陽人王福山人也宣統
庚戌春二月

嚴覲侍抱欄永慕圖跋

戊申之春覲侍出抱欄永慕圖屬題忽忽鮮暇未著一字
無何而覲侍凶問至矣此圖度閣上不忍視哲嗣迫莊今
來索圖秋窗展卷悽然不怡警欬如逢良朋難再傷矣古
者曾氏之養親必有酒肉覲侍事親孝其爲曾子之養志
而不爲曾元之養口體歟蓼莪之詩曰哀哀父母生我劬

勞又曰餅之罄矣維蠹之恥此孝子身世勞苦不得養親之所作也覲侍其亦有蠹恥之懼而深念生我之劬勞歟方其作此圖也將以伸永慕之思焉今永慕之思終矣又將移此永慕之思於其後人後之人其珍藏此圖無失其永慕之思以縣縣于不絕是則此一圖也天下之至情寓焉爰書數語而歸之宣統建元己酉九月

道光五年摺紳錄跋

周禮御史凡數從政者鄭康成曰自公卿以下至胥徒凡數及其見在空缺者說者謂從政之人必書于策御史掌其在位名數先後之次焉左傳策名委質杜氏謂書名於所臣之策此士之仕者注籍于官古制然也漢書百官公卿表年經月緯兼及里邑第所表者三公九卿及尹三輔者而其他皆不具漢應奉爲司隸時下諸官府郡國各上

前人像贊其子劭連綴其名錄爲狀人紀今諸書中所引漢官儀有諸人姓名疑卽所謂狀人紀者陳氏書錄解題有應劭漢官儀一卷載三公官名及姓名州里李埴補一卷俱不傳隋書經籍志所錄有何晏官族傳十四卷王秀道百官春秋五十卷無名氏百官春秋二十卷魏晉百官名五卷晉百官名三十卷晉官屬名四卷陳百官簿狀二卷唐書藝文志有陸機晉惠帝百官名三卷其書皆亡世說新語及文選注尙引晉百官名名字州里悉具與今摺紳錄之體例略相似隋志稱正史表志無復百僚在官之名摺紳之徒或取官曹名品之書撰而錄之別行于世宋齊已後其書益繁然則此風盛於六朝而卽今摺紳錄之所自昉弟當時多撰自私家今則編錄于官耳至摺紳錄之名不詳始于何年大約沿於明世順治康熙年間已有

此書其體例與道光後之書稍異卽乾隆中之書亦稍異其體例之變也亦不詳始于何年此編爲道光五年冬季所刊惟欽天監監正李拱辰監副高守謙畢學源皆西洋人爲後來所無刑部司獄尙分南北監其制略殊其餘與咸豐後之書無大差異朱旭辰比部珍藏此編徧徵題詠宦海升沈之多故世運變遷之靡常卷中諸作已詳言之矣獨沿革未及故略爲考之如此學識寡陋恐尙未能無疏漏也今者政治方新官制多變以此編證之又足動今昔之感者矣宣統改元仲春

馮曉滄殿試卷跋

舊說殿試初見于唐天授元年而其制與今異迨宋開寶中省試後再行殿試乃爲殿試之制所自始然漢武帝初卽位進賢良文學之士而親策之實爲殿試之權輿 國

朝制沿前代尤重其選天下之士咸競爭焉每科試竣卷
儲內閣若遇清釐塵積則卷得領歸向來舊家多有珍藏
其先人試卷徵題詠以爲光寵洵荻林佳話也馮曉滄年
丈爲 先大夫乙巳會試同年又同官西曹是科殿試列
二甲第四十名 文孫公度參事領卷歸屬記其事憶咸
豐同治間余每詣年丈修謁必蒙枉駕教言眞摯古風可
欽忽忽已數十寒暑盥露展誦謦欬如在目前矧參事之
珍重先人手澤慎守焉永保焉其懷慕爲何如哉今者千
百年之舊制廢矣臚唱大典不可復覩後之人遐想升平
制度而發思古之幽情將必有感慨係之者更念方今天
下之士羣流彙進其所競爭者又別有在則得失之故正
有可以考見者矣

遵化直隸州知州嚴君墓表

古之良有司奉職循理未有不以利民爲治者後世能吏多循吏少近今尤罕觀若遵化州牧嚴君者乃其人也君諱以盛字琴墅一字觀侍系出莊氏漢世避諱改氏嚴宋南渡時卜居烏程之鳳林里遂世爲烏程縣人年十六入邑庠光緒乙酉科拔貢生本科舉人以知縣筮仕直隸充鐵路局文案差後局移保定君偕來遂入保定府發審局始研究民事心細才敏同官歛手服庚子拳禍作毀鐵路其未毀者尙百八十餘里君與孫觀督鍾祥竭力保全官

民避禍賴以濟者千數百家迨聯軍南下君先往見參贊英人傑彌遜與之款洽保定免驚擾時道路阻塞江浙紳士仿紅十字法爲救濟會保定會事君任之行者舟車居者宮室衣食病者醫藥死者棺衾罔弗備賴以濟者復千數百家自聯軍來訖于去交涉難僂指數惟君之贊畫爲

多以勞補西甯縣知縣時光緒二十八年 月也自是遂得專心于民事其後署多倫諾爾廳同知調大名擢滄州知州未赴任署趙州直隸州擢遵化直隸州知州未赴任先署景州旋履遵化本任復以勞 賞戴花翎在任以知府補用君所至以利民爲本頌聲滿路大吏考績吏治爲畿輔第一以卓異上聞屢邀遷擢行將大用矣不幸以微疾謝世上官聞之莫不咨嗟太息曰何奪我良有司之速也君之在西甯也拳亂後賠費九萬教民勢張甚君下車卽與教士約曰款我任之教民之擾我民者必重懲汝勿祖也乃補教民之擾民者置諸獄邑富戶少親赴四鄉家喻而戶曉之民感於教民之罪勿貸積憤已舒官又休煥之也大和款遂集逾數萬君又慮民力之不逮請於上官爲籌三之一復與教士議微減其數不數月而款悉償時

新政方萌芽君謂教養爲治民之本務不可緩卽籌款設學堂定教育法邑產鹼歲入僅千金君爲之區畫歲人遽逾萬凡事之利于民者雖小亦無弗爲也如此其在多倫諾爾也廳孤懸邊外無城郭馬賊時出沒街市中君相度形勢策馬風雪中親爲規畫建堡門五巷棚七十一稟準免解皮張貢銀爲修築費不足則募之民民踴躍輸將恐後遂勾工庀材工半而君去民欲循借寇故事格於例不行工竣而盜不敢犯閭閻安堵民爲立碑紀其事并伸去思也其在蔚州也地近邊盜從邊外入君自出資募勇數十名晝夜巡邏行旅晏如民曰烏可以衛民者累官相謀輸資餉以充故終年無盜創設習藝所二一在州治羈罪人一在邑中羈浮浪之民民有子弟不率教者咸乞收所中責令習藝賭風素盛官弁羣利其規費嚴禁之賭風以

息州有古河久淤廢區盡開濬資溉灌者田若干頃教民某怙惡爲民害捕而囚之教士來乞恩峻拒之教士怒則婉謝之終不許嘗以暇循行郊野爭訟細故隨地訊結民可不入城官民相習而訟以希其在大名也地爲附郭首邑界東豫多盜數前令某以能治盜名不二載所殺六七百人而盜不衰君至惟厚餽捕役而嚴束之不安戮一人而盜亦希時朝廷頒新政君次第舉行尤亟亟於學堂城鄉分設若干所爲之定規則籌經費爲久遠計巡警創自天津頗具規模君試辦於郡城中規模整肅與天津埒郡守榮公恆素有賢能名獨於君敬服焉深相契恰有毀君於大府者榮公力爲剖雪之其在趙州景州盡心民事如在大名時君又以裁判未成立不妨少變通之舊時訴訟者有狀紙費除代書外不得名一錢而吏役需索不可

究詰君曰狀紙費亦印花稅之一也與其禁之不能不如
明定其額額外取一錢者嚴懲之試行於趙州數月民便
之僉曰此數月中吾民省千金矣其至遵化則光緒三十
四年正月也積案數百起君曰訟不結民受累矣乃昕夕
理民詞未兩月而積案清方籌學堂巡警諸新政事未集
適天時亢旱晝夜祈禱四月十三日乃得雨君冒雨歸遂
得疾十四日猶坐堂皇判事十五日子時端坐而逝君幼
勗學喜讀宋儒書長乃究心經世之學聲名重一時從游
者眾所著有漢學師承記校補經義粹編夢影廬詩稿若
干卷其事親孝持已廉待人厚嘗曰節一己之用作益人
之事吾樂爲之又嘗曰作官總當以利民爲心教養二字
實力作去不務近功而自有實效若州縣不行久任法吏
治安得有起色乃君之爲牧令也衝替頻仍多倫諾爾僅

四月趙州不及六月遵化不及四月餘不過一年抱利民之心而未竟利民之用此不能不爲斯民痛惜之者矣公生于咸豐九年十二月二十日亥時享年五十有三曾祖祖 父 咸以君貴贈如其官配金氏子一啟豐副貢生民政部民治司員外郎孫三將以宣統元年十一月十一日葬君子鳳林里之原啟豐以同里沈家本知君深持狀來請表君墓家本禮辭不獲方今吏治日衰人人知自利而無以利民爲心者故論君之利民之大者而書之石其亦足以風世歟

嚴秋樵傳

治小學者以許氏說文爲大宗而治許學者以近今爲盛嘉慶道光中金壇段氏曲阜桂氏安邱王氏其尤著者同時吾鄉姚秋農嚴鐵樵兩先生同治許學嘗欲纂說文疏

義先成長編七十卷又作校議三十卷疏議久未成而校
議風行于世桂氏王氏多采其說實足與諸家抗衡焉嚴
秋樵先生鐵橋從弟也亦治許學罄心渺慮不屑隨人爲
俯仰以校議千慮一失不能無遺憾乃爲之正謬譌補遺
漏昕夕研稽不間寒暑雖家人婢子亦知其專力于說文
正若康成之婢之能誦泥中也積十有餘歲成校議議卅
篇凡三千五百九十條於校議爲諍臣於許學爲獨樹一
幟顧鐵橋負盛名舉世相推重而先生名不出里巷吾鄉
治許學之在同治間者有安吉張子中行孚所著說文發
疑高叔猗爲刊之于身前說文案音袁爽秋爲刊之于身
後此書獨未能鋟諸木而傳于世學之顯不顯殆亦有數
存乎其間者耶不然治許學若先生者亦足與段桂王諸
家相頡頏而砥礪之又何多讓也且是書之成也鐵橋已

修文天上竟不獲風雨連牀互相質難俾疑義之不易議
決者得以渙然冰釋當亦先生之所深憾者歟先生名章
福字雲甫又字音甫秋樵其別號也歸安廩生性孝謹居
親喪水漿不入口者累日哀毀盡禮所居村中有樂善堂
經畫周至家有小園蒔花木築小山名之曰拳石作拳石
山紀以記之與二三知己時觴詠其中翛然自得精篆書
性嗜蟹又善畫蟹而靳不與人畫蟹蟹熟時人餽以蟹求
畫蟹則又欣然畫蟹不靳也其風趣如此歲丁巳粵寇擾
浙西流民東趨先生與丁寶書施均甫諸君經理撫卹局
事流民之疾病者必親視醫藥炎暑巡行廠中遂染時疫
疾亟時喃喃惟以流民爲念迨病革流民皆慟惜有哭失
聲者生平知交多一時知名士海昌許珊林槌烏程蔣繼
卿維培往來尤密校議之議多與二君相商訂二君並治

許學者也其所箸書之本于許者又有經典通用考五音類聚二書經典通用考者謂說文皆正字經典多段借本無其字謂之段借本無其字而後有字者亦不得謂非段借通用亦段借也乃以十三經段借字依說文部次而以正字別之凡十四卷五音類聚者謂字無出宮商角徵羽五音外者古音莫備于說文凡言从某某聲謂之形聲孔通也香芳也字乳也酉就也天顛也謂之諧聲形聲賅諧聲猶段借之賅通用合羣經之韻爲韻不若以一人之韻爲韻故但取許語而以五音爲類凡十卷又有聞見異錄四卷古文兩卷古今體詩四卷雜著二卷駢字類鈔四卷統名曰近許齋彙編凡七十卷藏于家

枕碧樓偶存稿卷七

詩一

詠史小樂府三十首 己未

守冢高皇置雲沈大澤鄉中原爭逐鹿首事夥頤王
絕唱虞兮和聲聲恨逝雖芳魂化芳草還爲歛蛾眉
苦索常山首而忘刎頸言滔滔抵水去誰與共招魂
外黃免屠滅首肯十三兒白髮居鄉老曾無諷諫詞
縞素六師東昌言自董公休嗟名字沒茅土已酬功
奇冤鍾室獄漢祖且憐之孰念遭烹者高陽酈食其
僖負餽盤飧閨中有品論江寒龜手苦一飯進王孫
南昌悲落魄尊食誤晨雞邱嫂猶轅釜休嗔亭長妻
帶彌功臣誓偏遺紀信名中山留片土猶識漢時城史記高祖
功臣侯者年表高梁侯酈食其子高景侯周成苛子襄
平侯紀通成子並以父死事封而紀信獨未聞蓋無子故
也定州志有紀信城在州南五十里云是漢高帝築以封
紀信者豈如縣上之田以旌善人邪書闕有間僅見於一

邑志乘恐古事之類是者其湮沒多矣靈壽縣志紀信臺在縣東十里高五六丈有紀信廟

奢麗亡秦物名言發狗屠淮陰羞與伍翻作漢廷俘
尉虜敖前死黥降究被誅傷心奈何帝吳芮尙分符
縣葦參秦法朝儀起叔孫兩生招不至古制與誰論
禮樂烝民重烏能待百年遂教三代制歇絕賸遺編
太上加尊號何煩擁篲迎雙南加令錫愧殺漢公卿
慶鄭難逃死旧豐竟見收白登兵罷日建信遂封侯
是豈干卿事偏回洗耳心批鱗多諫牘誰識紫芝吟
傾危齊辯士長短說何工橫信雄圖歇還聞救蒯通
大義親猶滅休騰賣友譏公言殺諸呂血濺漢臣衣
志雪高皇恥河南郡縣開單于庭北徙衛霍信雄才
載美臨邛返風流一曲琴不圖高士傳慢世有知音
北平飛將老飲恨未封侯灞水聲嗚咽魂歸醉尉頭

死灰然卽溺獄吏苦相欺內史徒中起還聞善遇之
寂寂江都相詩書好自娛未聞東閣客推轂有名儒
礫鼠深心見亭疑傳古論李文誰告變顏異竟銜冤
頗納家財半奇哉卜大夫耐金失侯者齷齪守錢奴
漢使隆蘇武蕃王寵李陵河梁遺詠在友誼至今稱
曲突薪誰徙吁嗟霍氏亡空留麟閣畫書爵不名光
勲業爭方召深恩出漢朝中興蘇祭酒圖畫姓名標
一代稱賢傳傷哉飲鴆時趙韓兩京兆死後繫人思
少府爲猴舞賓筵笑哄堂正言東鄉坐卻說次公狂

稻粉爲餌雜味作餠潮俗以形似呼爲圓子方言餌
或謂之飢音元王氏廣雅疏證云飢之言圓也今
人通呼餌之圓者爲飢其說是也俗亦呼圓子開
元天寶遺事宮中每到端陽節造粉團角黍貯於

金盤中以小角造弓子纖妙可愛架箭射盤中粉團中者得食其字正作團白香山有寒食過棗糰店詩其字則作糰團字會意糰字後加旁耳都下家人偶試爲之風味不減故鄉也

鉅架拗蒼頡振饒微楚辭餽飪願篇錄餽飪張雅稽畢羅及飴餹後世名尤熾當筵數食品四方各異宜吾家傍茗雪冲醺鄉井離碧鱸紫蟹外風物常繫思新稔釋叟叟掬來礧中治紛霏若屑玉合之乃成糜熬豆陷其中或切肉若脂呼之以圓子香騰湯籠炊證諸六經內名義猶可推饒人羞籩實糗餌與粉養餌者爲合烝養者爲餅之鄭語互相足妙詰承先師諧聲釋古意餌曰相黏而就形名爲飴說豈方言遺形聲有玉埋制字非好奇唐宮射粉團弓小金盤敲棗糰滿午店寒食香山詩旁參更互證別說毋

庸疑僇爲漢人語

揚雄方言
僇謂之僇

夢得不敢題子京據周官短

什輕相詆風俗判古今名狀本難齊高年賜珍食仲秋紀
不韋方音辨充豫澹詳劉熙櫻廚具小食頓訝精瓊麋
客中試嘗新舉室甘如飴搏鎚共酪奴臭味何差池此物
安足貴貴似家中時鄉心正不遠乃逐南雁飛

整裝南歸袁江淪陷道阻不果行

庚申

零雪塗方戒遲徊百慮覃暮雲棲屋角春雨夢江南程滯
依依燕門留劫劫驂清淮烽火惡消息畏頻探

走筆

身世蓬飄梗光陰斧爛柯百年忙裏促萬感淚中多酒好
不能飲詩成空自歌囊餘一長劍倚柱幾摩挲

悲武林

角聲促吳山足鼓聲哀西湖曲鼓角動天地湖山亦遭辱

旌旗不飛揚落日亭臺黃昔日銷金鍋今日瓦礫場蘇公
隄上喚春鳥城西日日泣枯草

朱藤花三十首

省識芬芳發繁英滿架紅晚迎梅子雨春送楝花風態寫
縈紆裏妝憐窈窕中柔枝長善舞壓過畫牆東

一院影蒙茸輕雲疊萬重淺烘朝日麗深裏曉霞濃紫骨
翩躚蝶青盤天矯龍若教開五色石室訪神農

香滿酒杯雙沽春酌玉缸陰眠留客簾風綰讀書幢蓊蓊
花當戶濛濛影護窗纖條低蹴地濃碧接蘭茳

一笑湘簾卷名花坐對宜鮮明眞可愛磊落亦多奇無力
桃含蘂含情柳挂絲數尋葦馱蔓詎肯倚喬枝

不辦花多少嫣然帶四圍鴛簷虹采斷垂澗月光微帳啟
紗籠絳衣裁錦染緋嶺南煙雨裏珍重惜芳菲

小坐塵氛濯披花展卷初霞光夷甫紙珠佩伯英書麗殿
香風細玲瓏皓月虛刻溪看不厭掩映翠羅裾

一望綠相扶條鈴護得無風簾編百琲雲幕綴千珠似芍
何堪贈如菱未可呼摘從蕉葉外合繫美人襦
最喜陰堪庇層層壓架低晴光臨研北雨景射林西山近
穹窿鵲家依罨畫溪小兒將土鼓打過落花畦
藤帽復藤鞋支藤步小齋垂垂瓊作佩婉婉璫爲釵直繞
芙蓉檻長托芍藥階深庭吟賞得不必住斜街

花影深無際文軒面面開近松疑琥珀如火訝玫瑰挂月
依蘿磴和雲覆石臺還邀佳客至踏破半弓苔

老幹纍纍繞經霜古黛皺無言誰索笑獨立不爭春見說
飛空殿休教委暗塵忍冬偏耐冷異色燦金銀

安得凌空上高撻匱市雲紅窗疏若我白石瘦憐君寂寂

資幽討縞綿殿眾芬金尊傾倒甚沈醉舞榴裙
 不識何年植虬梢繚紫垣笑他纏古木愛爾託孤根出霧
 花常挂迎風葉亂翻未須憐躑躅離畔展春旛
 萬朶枝低亞溟濛盡吐丹光明懸寶鏡繚曲爛瑛盤帶絡
 千重幄旒垂十二欄搜拏分左右疑有舞蛟螭
 雲氣擁柴關飄零几席間空搖絲完轉飛點石爛斑臥綠
 光臨水危青缺補山花前判一醉惆悵幾回攀
 芳訊從頭數風光又過年珊瑚一樹碎瓔珞四垂圓花事
 荼蘼了著痕薜荔牽送春春不駐春色尙餘妍
 千萬花零落紅英滿地飄芙蕖開夏豔蒲柳望秋凋糝簞
 沾青簪飛衣襯碧綃相思偏歷亂春日駐迢迢
 風轉南薰遞新條曲曲交檀心纔迸舊藤腦共含苞役藉
 園丁執詩期客子敲荒蕪刪略盡清露到堂坳

密葉俄成幄陰陰蓋瓦高麥黃新水活松赤舊棚牢帶草
珠龍鼻牽絲玉虎勞土膏都覩起晚霽意蕭騷

萸衍虛空引隨風嫋嫋花萼然山荔認藥綻蜀櫻多格滿
紅遮日簾開綠蹙波何殊靈石勝好和李侯歌

幾日花輪轉簷深盡是花有人簪小朶到處吐奇葩羃歷
侵紅袖離披罩茜紗不隨桃李笑也自擅風華

對酒思錢起題詩和許裳人疑鳴佩玉天爲飾明璫巢鶴
垂綸覆吟猱接葉藏瑤琴歌未罷馥郁滿筠廊

緬想棲雲客幽龕自結成瓏瓏煙欲澹瓏瓏露多明深澗
稀人迹高巖隔世情但看花瀨淨紫氣靜中迎

酩酊笑劉靈花醒醉亦醒無聲延夜月有夢帶春星繞井
方懷蔡游山欲訪丁寄書長不達枉說敘江亭

愛敬禪機逗平泉相業微無花憐石合有種采金陵價亦

千金重名空萬歲稱何如懸穀穀人倚玉闌凭
底事香山老吟成刺不休陸離偏自炫屈曲善能柔祇以
鋪歌席居然絡素幃可憐松與柏束縛亦無僞

雲錦張千疊爲何弔不禁文章真擅美欣賞孰知音徑有
童兒掃門無俗子臨元興風雅甚長抱惜花心

我亦襟期曠奚須指喻參欲招沽酒旆不入賣花籃細藥
蠶還抱餘芳蝶正探哺黃中綠裏香韻一叢含

道是常春本殘春飛入簾拂茵芳草引滿屋古苔黏結實
垂懸檣抽條刺綺簷主人醒已醒寂寞對牙籤

葛藟不須絨餘英徧絳巖鷓鴣依竹喚雀豹帶泥銜藤院
詩懷嬾荷亭酒令嚴更看裳佩舞露溼藕絲衫

采蓮曲

綠波清影倩誰扶萬柄亭亭泣露珠愛殺此花塵不染阿

儂爭比此花無

蓮子湖頭唱采蓮玲瓏碧腕劇相憐花心輸與儂心潔
蝶紛紛亂入船

郎船移來北渚泊儂船移向南湖橫勸郎船在花中住
儂自無情花有情

七月二十七日出都道中口占

倉猝驅車去倭遲古道斜西風枯碧草白日走黃沙
宮闕連烽火關山泣鼓笳木蘭秋獮地回首陣雲遮
時有行幸木蘭之信

八月初五日入都

聞道王構使金人已許成鯨波當暫息鶴唳不須驚
且喜帆無恙還疑鼓乍鳴夢魂今夜定安穩板輿迎

初九日復出都感賦三章

剛報平安火星躔遇角張將才推衛霍國是問狂黃幸陝

思唐室征遼感宋皇艱難膺重寄宏濟仗賢王
竟賣盧龍塞空聞血戰鏖乘軒難使鵠非不孰教孫密畫
中行策虛持屬國旌鳳城天尺五雜虜任遊邀
刁斗嚴軍令勤王尙有兵前茅孫叔將細柳亞夫營感慨
誰投筆陷危欲請纓桃源何處是山墅計行程

度蘆溝橋

車聲低和水聲涼策馬荒城曉色蒼雲亂涌成千里白風
狂吼起一天黃沙程確犂石多子野徑模糊林有光太息
連營依古道橋頭不敢苦旁皇

將入西山

漸入崎嶇境秋風送馬蹏山多偏路窄野闊覺天低暫息
勞人駕遙聽戰士聲四方嗟靡騁聊借一枝棲

周氏山莊

地名林
子園

門外柿陰稠村居分外幽山低平似岸屋小穩於舟葦蕩
多巢鴿松坡好放牛主人能愛客木落話深秋

偶占

天公漸有飛霜意紅欲嫣然碧欲疏忽聽牧童呼得夕
陽深樹放青驢土人放牲畜於野日放青

中秋風雨

昨宵擬作廣寒遊曉起滿山雲氣浮天意更添羈客思風
風雨雨過中秋

夜晴月出

雲斂煙消萬里晴銀河斜轉鵲無聲若非一雨先期洗那
得團圓分外明

聞雁

一聲哀雁起秋涼午夜銜蘆爲底忙我有愁心何處寄夢

中隨爾過瀟湘

西山雜詩

蔚藍一色淨無痕爲看山光偶出門
秋雨黃花懷古寺夕陽紅樹問前村
歸鴉噪晚添人恨旅雁催寒斷客魂
莫向白楊深處去蕭蕭風起暮煙昏

秋深密密疏疏雨寒到黃爐白板間
隄上碧楊陰蒼莽牆頭紅葉溼爛斑
風餐吹破屋旁屋雲涌飛連山外山
我薄相如轉多病扶筇躡屐力猶孱

九月二十日復入都

側聞高會宴南宮寶主雍容禮數崇
萬國語言通譯象三軍面目化沙蟲
血沈滄海蜚魂碧煙鎖阿房楚炬紅
歲幣但增三十萬乃知寇準是孤忠

六街景物歎蕭條畫角悲鳴暮復朝
數點城烏啼月冷千

羣胡馬向風驕羽書直北關山遠飛艦征東壁壘遙宇內
兵戈今未息暫棲人海挂詩瓢

除夕

轟轟爆竹鬧連宵無限煙雲過眼消萬戶桃符新氣象依
然吹出太平簫

病中見桃花

辛酉

爲問卷簾人桃花開也未料有隔牆春和風送香氣
折來三兩枝想像雲臺側插我膽瓶中濃淡認春色

三月二十六日出都大風重度蘆溝橋

漫云男子志桑蓬又理晨裝驛路中風色不分天上下河
聲難辨浦西東摧蹄石卵雷鳴轉撲面沙痕雨點同回首
去年鴻爪印橋頭太息恨無窮

夜雨宿保定遇辛楣話舊

頻年事業太伶俜夕稅征輶暫息形
褻鴛鴦香初撥蠶澗
鰲魚美試分腥春寒把酒家山話
夜雨淋鈴逆旅聽一枕
華胥君莫喚且容歸夢到紅亭

雨後早行

兩三寥落曉星明如砥芳原案轡輕
宛宛嘉苗含雨布濛濛
官柳拂雲生晨光泱泱鴉邊動新句
推敲馬上成風輓
沙平吹不起卻添爽氣撲行旌

方順橋

屬滿城縣

惺忪睡境不分明忽聽行人說滿城
緩轡正將殘夢續荒
村啼徧午雞聲

嗷飢瘦婦還餘淚索食癡兒慣乞恩
繪出流民圖一幅當
年賴有鄭監門

望都縣

三梁亭古曲泉清客路風和爛漫晴老樹連雲都繞郭雜
花滿地不知名荒祠雨蝕伊祁碣故壘煙迷主父營惟有
安陵遺愛在合將芳芷薦班生

歌女詞

林表隱隱夕陽斂指點前村問茅店客子入門乍稅駕歌
女沿門各逞豔客笑問主人此輩來何頻主人笑語客土
風爲君白女兒初墮地耶孃遽咨嗟長成八九歲妄念偏
又奢刀尺不令學但令學箏琶箏琶未精熟鞭笞隨之加
車聲鄰鄰客子到亂搽脂粉競喧譟弦聲嘈雜歌聲譁下
里巴人不成調慳囊破費幾文錢便道能投客子好耶孃
妄念正未已安得千金客買笑

乞兒詞

人笑儒生把書卷便學顏子忍飢面飢驅出門意願倒短

車乍來濡水畔夾輶烏烏音可哀乞人負負村中來
雖女走相逐叟嫗匍匐趨塵埃前者方散後者聚傾囊頓
盡錢干枚客意此邦年歲薄村翁爲我言約略南村打麥
家盈甌北村新筍滿鑿落東村西村遙相望叔苴斷壺亦
不惡男女四五歲父母爭相教教之呼爺爺乞相尤難描
但遇客車到滿村互招要一錢乍入手便向同村驕老諄
習未忘難將生涯拋生涯豈樂此聊學哀鴻嗷客聞此言
長太息禮教旣衰俗難易簞食瓢飲苟余昇嘒爾而與急
何擇吁嗟乎甯戚角酸員簫悲英雄末路嘗如斯蒙袂輯
屨信奇士不食嗟來甘餓死

定州早行

新晴

閃閃塔尖紅日依依林表白雲漠漠平沙卅里鄰鄰遠水
三分

陰雨度滹沱河

渡空舟無人渚淨沙無迹驅車過滹沱清風拂衡輒水淺
聲潺湲隄新勢險窄積陰旣成暝向午忽疑夕雨滋苗更
青日隱樹逾碧冒霧孤城雄生煙遠村僻疲驟嘶荒蹊飛
鳥投古驛方期返故園乃爲萬里客

新晴樂城縣曉發

歸雲尙擁樹旭日駐扶桑我行一以眺曉色何蒼蒼農夫
荷鋤出得得烏犍忙土膏正覩起苗潤含清光車行深霧
中空濛沾衣裳材舍失近矚樓堞迷遠望須臾斂晨氣雲
霞絢東方北指治河堡南瞻臥龍岡戒途道彌永成裝情
更長旣作汗漫遊曷爲念舊鄉

柏鄉縣

溝澮唐渠水雲煙漢縣亭野花扶轂紫晴荔繚牆青墓古

成郊陌橋平接驛庭黃巾方擾擾行李莫留停

東捻距此百餘里

臨沼關有感

雄關屹屹倚青冥沼水滌洄擁帝庭方信張仵工墨守卻
同陽虎戰蔥靈妖氛過後千村赭燐火歸來五夜青指畫
山形思馬服登壇故將悵凋零

由沙河至邯鄲官道多楊樹有榦無枝居人薪之也
枚肄漸生幸矣

碧雲夾道都成杌尋斧何情日夜忙賴有綠蕘經雨長幾
希生意悟枯楊

盧生祠

在邯鄲縣

升沈幻萬端一覺華胥境塵世本如此何必先生枕
振策過邯鄲古祠倚村曠主人梁正熟我來揩醒眼

磁州

波光雲影嫩涼收
五爪渠分泛鴨頭
布穀聲中秋水足
蘼風廿里過磁州

二把手

十丈黃塵染客衫
不須輕騎走駉駉
隻輪徐轉如丹穩
一幅乘風舊布帆

度漳水

賀蘭山翠逐人來
漳水滔滔去復回
身後是非瞞不得
枉將疑冢築崔嵬

銅雀荒涼對夕曛
老瞞事業論三分
可憐鬱鬱西陵樹
詎有歌聲地下聞

康叔祠

在淇縣

尙德屏藩重於今
廟貌崇周王頒訓
誥殷族就磨礱
萊竹歌淇澳
椅桐美楚宮
雲仍繩祖武
千載想流風

新寨口度黃河書事

未明戒徒御屈指渡河早渡口外南北往復轉迂道

道間

渡移向南遂南赴顏家莊則渡口又移向北復北至新寨口

夫子迷楚津問途遇野老

飯生溷風塵僕僕胡懊惱行行來渡頭

新寨口

午暄變晴昊

狂瀾動天地奔飆盪城堡沙石亂飛走萬騎驟驚擾長年

共束手相戒勿輕訔回車荒店冷屋破還隘歎敲仄牀支

龜穢濁肆同鮑從者飢難興食竝乏惡草但逢賣漿翁黍

麋勝松麩想彼蕪蕪亭公孫佐新造真人歷戈馬豆粥欣

一飽行旅每艱苦更事念不少

甲寅道出東平景象略似此

危坐鞞輶

中竟夜夢魂悄詰朝風力衰衣裳遽顛倒亂流不可渡長

河瀉浩浩方舟理篙楫邪許腰態拗時或張輕帆飛送疾

於鳥彼岸誕先登回首望晶滹惻惻歌公無惕然色猶愀

早食趨前村風定看東臬僕痛馬亦瘡我姑酌清醪

沿河村落多苦楝樹花正開放車行萬樹中風塵仙境也

彷彿海棠穠豔發紅飛成雪紫成霞者番風送餘曠後開徧千村苦楝花

車中見野花口占

野花自開落氣逐陰陽移照耀歧路側五色光離離慎勿譏小草無憂亦無知今我抗塵走息影當何時

潁橋

鎮屬襄城縣

故壘今蕪沒平沙夕照收哥舒鏖戰苦猶說潁橋頭

小商橋

在臨潁縣南二十五里

直搗烏珠壘風雲慘不驕背嵬三百騎血染小商橋

汝墳橋

在葉縣北澠水上

當日昆陽戰風雷屋瓦飛至今澠水上猶有夜燐歸

篤樹

在裕州北四十里

亂後遺黎僅有存
編茅臨水聚前村
街頭日日高車駐
短牆開小小門

新被搶匪焚掠

臥龍岡

蕭蕭五丈營
鬱鬱定軍樹
惟有臥龍岡
白雲自來去

白水村

在新野縣北

依依林表起炊煙
村外薑田接蔗田
難得平林蹤未到
大

家雨後策烏犍

樊城

屬襄陽縣對岸卽襄陽

接天河水自西來
好似葡萄潑綠醅
一角斷雲鄧子國
半竿斜日漢陰臺
自然洲勢棲漁艇
無數山光入酒杯
最是樊侯祠宇煥
幾行清蔭鎖高槐

風雨泊白家行

水程距樊城七十里

黑雲眾山合天地入筓冥襄水日夜急風雨稍嚴程危坐
噤無語羈泊難爲情繫舳望莽莽狂飈馳迅霆潭蛟挾電
走江豚吹水行青沒烟暝靄白飛練縱橫陣急打篷背漲
盛迷灘形洶涌怒濤立瀕洞碕岸傾孤艇亂敲側所聞惟
碎舂中宵數起視燭影寒不明頻頻喚舟子鐵鎖盤交半
客睡胡未穩轉側魂夢驚不覺天欲曙模糊送雞聲披衣
問童僕雨息風猶鳴澎湃不可觸念爲濡滯榮何當效宗
慙萬里長風征

沙洋便河雜詠六首

沙洋鎮在荊門州東南一百四十里西魏之綠麻
縣也相近有綠麻山故沙洋隄亦名綠麻隄便河
當卽建水一統志建水在荊門州東南今名建陽
河一名大漕河源出龜山南流入荊州府江陵縣

長湖今此河水程行一百十里入長湖一統志謂
長湖在荊門州東南二百里青寨村殆以陸程計
也河水深數尺岸廣丈許極廣者三五丈船名拖
扁子舟人日手雙篙不用槳楫沿途風景劇佳卽
目得六絕句尙未能狀其幽趣

薰風送上綠麻隄細草成茵似翦齊新水纔深一二尺雙
篙撐過小橋西

彎彎轉入小塘行河廣眞容一葦橫荻葉打篷蒲進檻涼
收圓壁綠雲輕

小谿之繞路三叉風景依稀似若耶茅屋夕陽閒曬網絲
楊深處是漁家

催耕布穀隔村多臥聽栽秧躍馬歌偶起挂窗看水面金
波蕩漾浴青鵝

漁簪到處帶漁舟
溪畔人家屋枕流
兒女也知臨水釣
一竿斜倚柳梢頭

鴨頭新漲沒田塍
倒影平橋月有棱
曲折穿行深樹裏
繞船蒼翠護千層

沙市弔司馬夢求

宋沙市監德祐元年殉難

湖清通荆江
港汊多歧出孤城
據其中戎馬制奔軼
江陵號雄藩
賴此犄角設一旦
春水枯天心祕清謐
胡騎蹈瑕隙
干軍奏筆策南風
更作惡鬱攸勢難遏
此城痛摧殘木州亦隨沒
將軍擁貔貅平時盛咄叱
兵敗乃生降草間忍偷活
微官雖祿薄此膝烏可屈
浩氣歸太虛朝服拜北闕
臨危頗從容愧彼膺節鉞
殘兵半新鬼沙頭哭明月
忠魂夜歸來英風還烈烈

交溪阻風

屬安鄉縣

矯首牙旗仍北指南風薰透藕絲衫推篷浪影翻杯底打
岸潮聲送枕函羈客閒吟刪舊草篙師酣睡倚危杉科頭
箕踞偏蕭散笑數來船盡挂帆

五月望日武陵縣舟次食鱖魚

名辨當魴箋爾雅榴花紅處薦櫻廚不知當日仙源裏也
有嘗新異味無

上灘行

一山復一山山峭難側足一灘復一灘灘險不可觸浪漩
靈潭深波摧亂石轟中流奔急湍危崖瀉懸瀑砰訇雷鼓
鳴槎枻雪峯簇又如羊腸道斗折還與曲貫耳驚眾聽眩
目駭遙矚舟子亦戰兢奚奴半喘縮視彼下灘舟疾如刀
破竹顧我上灘舟難於魚緣木人心每生妒我額未嘗蹙
曾聞九折坂叱馭動殊俗山川有險阻何分楚與蜀千古

仰壯懷王尊信吾屬

瓊子洞

一統志在沅陵縣東一百八十里其形如甕水流洄洑舟行甚險

沅江合青冥輕舫上烟靄朝沿攫奔湍夕溯惕怒瀨惡灘
狀若甕奇險古爲最上有千尺巖壁立聳嶢峴下有萬丈
潭蛟螭窟其內洞深窈而曲終古闕幽昧飛雲偶然度倒
映恣驚怪舟行絕巘底如葉舞澎湃崩崖駭欲落仰視心
惴惴洪流洄洑多盤旋鼓礮礧還疑有神物攫拏舉相戒
百丈牽拽幾干夫氣喘喝徑仄不容足二寸垂在外藤蟠
蘚滑澁跼步難進退中流一不慎臚臚立粉碎聞昔有大
賈憫茲長年輩萬金鍊鐵纆穿壁聯若帶危磴刻垠堦隘
途闢荒穢人援鐵纆行舉趾得依賴役夫免顛蹶估船少
敗壞眾稱此豪舉馨香祝累代我來過此灘悚懼倚篷背
榜人謹操持努力不敢懈夜艤沙汭宿征魂定猶悸

清浪灘

一統志在沅陵縣東一百二十里沅水中

千山走合沓浩浩下沅水積阻勢逾怒奔騰四十里魚龍不敢窟鳬雁旦暮駭陷石攢中流林立露齒齒銛利刀劍鉞截鴻剽犀兕激蕩逞奇怪頑獷列礪礪倉猝攫其鋒投卵能無毀行李多戒心徘徊進復止獨有老榜師生長此江渚何處一石橫何處一石峙一一識於胸語尺不失咫波路既熟諳控縱智足使兢兢常自持小心未少弛舟行艱險中遂能平如砥迢遞江上程來往庶賴此乃知操術工由來有至理詎彼夸誕徒而可成一技巍哉伏波宮神爽主宰是靈烏送征旆千舟萬楫喜相將涉山頂螺盞酌瓊醢

鷓鴣灘

卽目口占一統志在辰溪縣南八十里沅水中亂石橫江舟航所畏

峯回面面擁青螺繚繞雲根卷白波水力勁驅危石聚薄

聲奔彙眾流多攬爭風脚徐徐上東坡詩弱攬能爭萬里雲椅轉巖腰
曲曲過新漲喜添三兩尺刺篙半沒舊時窠

銅仁東山

山在府城東爲郡鎮山絕壁間鑄雲彩江聲四大字

俯瞰洪流翠靄橫石榴關勢接山城但看入畫眉痕秀倍
覺當前眼界清雲彩何年歌紉縵江聲終日聽鏗銅好尋
隱隱磨厓字風雨銷沈半尙明

銅崖

在銅仁府城西南當大小兩江合流中挺然聳立高數十仞

雲水光中客泛艘山城南北導流雙烏羅甕濟西來達到
此天然共一江

七夕詞

闌干獨倚四更遲良夜璇閨寂寂時儂道年來息塵妄憑
誰說與雙星知

銅仁郡齋賞桂有懷舊游

疏林繚繞夜郎煙如霰花開也自妍憶昨嘗攀金粟影只
今空話木犀禪芬芳卻惹蠻煙惡皎潔偏沾萼露鮮倚柱
高吟桂之樹幾番惆悵翠巖前

追攀記得杭州好舟入西湖水面平靈鷲峰頭僧拾子錢
王詞畔客飛觥遙憐故國花無主漫喜中天月正明且學
髯蘇斟桂醕蠻方煙雨不勝情

九月侍家大人登東山同游爲會樞元觀察

璧光

馮仲慈年丈

拱辰

郭春三記室

子元

卽目紀事成

長律二十韻

幾日秋光好霜風著意吹催寒成令節尋勝趁晴曦緩緩
褰帷駐依依杖履隨龍山勞企想魚磴許攀追疑帽平林
密摳衣仄徑危丹垣張仲殿紺宇葛侯祠老樹名難識殘
鐘戢不知古鐘字泐亭空留斷瓦舊有川上樓古訪遺碑

舊有大觀樓踞山最高近矚神偏逸遙瞻境倍奇銅崖高處又有澄江樓今竝廢對峙石笏秀旁迤石笏山在南半壁橫孤幃郡東面卽山爲城峭壁懸崖天然保障雙江巢別支峰巒羅若帶城市布如棋小憩離僧室閒評畫幰詩紫茸憐飲薄黃菊惜開遲子固鴻才富是日觀家大人及春三茲有和作文熊雋辯馳仲丈健談聿偕書記美渾忘主君疲弱植洵多幸良游正及時把黃吟醉什囊露動遐思嘉會誠難再遄歸儻可期便乘鱸膾熟命駕返東籬

東關卽事

蕭瑟暮川秋秋光滿一樓晚涼臨水閣人語倚灘舟山淨月逾皎林高霜已適憑闌誰共賞把酒憶良儔

銅江秋汎

夕陽半在嶺掩映紅樹巔放棹暮秋壯山水澄且鮮泠泠碧流瀉稍稍青林牽瓜皮艇子小容膝良安便緣行石罅

中與石相摩研銅江皆灘淺處舟容窄更屈曲江多石可
容湍急難洄沿裸跣波濤中推挽如蟻旋篙力難施處舟
以行雖隆時或荷以首時或承以肩老孱敢自愛飢凍誰
見憐譬彼入寒獄不睹陽光暄生計竟託此造物非無偏
窮日始艤舟隔溪漁火圓夢中疑雨來覺知倚灘眠此時
眾竚寂惟聞水潺湲

江樓夜雨

寒氣逼簾窗紙破江樓鎧火半昏明雲濃漸欲迷山影灘
急翻教失雨聲南國三秋蠻地苦西風一夕故園情何當
瀉盡銀潢水頓使寰中洗甲兵

休洗紅

休洗紅洗多紅色變世情易翻覆雲雨掌中見君心匪如
金石堅新人宴爾舊人捐

十二月初八日由銅仁赴長沙道中作

又別盧陽去恩恩逼歲華宦途成苦海流寓當還家塵世
風波惡江湖日月賒桃源經兩度洞口鎖煙霞

過浦市紀事三章

沅之潯賊如鼠沅之府兵如虎連雲列戰格飛鳥不敢舞
明旦揚旌徼中宵震金鼓問君胡不揮天斧賊館昨夜已
無虜

賊聚如兔窟我壘無一卒賊奔如豕突我津予之筏偃旗
間道走疾於穿雲鶻雷鳴巨礮轟江東滿山樓閣煙塵中
男嘯女哭走何從噫豺狼在邑狐狸人立巢堂燕雀城隅
鳴吧

擊鼓其鏜寇飽遠颺前門拒虎後門進狼可憐千萬戶一
炬成焦土自來苦賊尤苦兵奪吾衣食豬吾宇君不開賊

如梳野有廬兵如篋村爲墟

二十五日達長沙

長沙卑溼地千古怨湘流賈子悲沈賦春陵願徙侯乃今
羈客至都作樂郊投祀事黃羊罷殘年逝不留